

Philosophica & imprimis Ontologica certitudo; ast sepsiotis his, Ontologia summa gaudebit certitudine simulque facilitate, modo origines idearum solícite, observentur.

a) v. Jac. Thomaf, l. c. p. 34. sqq. Dn. Wolffii Annotationes in suam Metaph. §. 367.

§. XVI.

Nimirum ideas nostras omnes primitus per sensationem & reflexionem a rebus, quas representant, oriri nunc suppono a); individuales istæ ideæ rebus sunt conformes, h. e. veræ reales b), adhæc certæ claræ, distinctæ c); accedentibus comparatione & abstractione, dum sepositis momentis discrepantiæ, id, in quo conveniunt diversæ ideæ primitivæ, unice mente retinetur, ideæ emergunt universales, æque ac primitivæ, reales, veræ, certæ, claræ, distinctæ d); harum idearum comparatio Axiomata suppeditat genuina. His unice observatis, atque seposito Autoritatis Præjudicio, facili opera exstruetur Systema Ontologicum realissimum, verissimum, solidissimum, certissimum, ad quorumvis captum, accommodatum, nec ullius hominis, cui deductiones idearum ex suis originibus innotuerunt, contradictioni obnoxium. e)

a) id quod alia occasione ex instituto probabo. Provoco nunc ad Lockii de Intell. Hum. lib. I. & lib. II. c. I. ipsumque Dn. Wolffium, qui, quamvis Metaph. §. 820. Lockianæ derivationi idearum extrinsecæ contradicat, in Logicæ tamen Cap. I. non potuit non eandem in Praxi inculcare, ita ut in Praxi Logica videatur esse Occasionalista v. §. 5. & 6. Cap. I. Log.

b) h. e. rebus existentibus respondententes.

c) vitia Intellectus sunt actiones mallæ, minus circum spectæ; in primis his ideis Mens non agit, sed patitur, teste interna experientia: Ergo etiam in his male agere nequit, adeoque defectus absunt.

d) comparatione enim & abstractione neque fingimus neque affirmamus neque negamus, sed, quæ sensatione & reflexione junctim observavimus, seorsim consideramus.

e) non vanam esse hanc spem, lectionibus meis Metaphysicis expertus sum, ex quibus, quamprimum per alias occupationes licebit, Compendium Ontologiæ emendatæ publici juris faciam.

§. XVII.

Vsum non condemnendum præstat Principium contradictionis a) cum in ideis nonnullis b) tum in Axiomatibus c) inveniendis.